



徐公文集卷第二十

東海徐鉉

百官奏請行聖尊后冊禮表

賀德音表

謝詔撰元宗實錄表

謝賜莊田表

為蕭給事與楚王書

又代蕭給事與楚王書

復方訥書



谷林止字書

谷左偃處士書

常夢錫行狀

薦處士陳禹狀

冊秀才文四首

祭文獻太子文

與中書官負祭江學士文

祭韓侍郎文

祭王即中文

祭劉司空文

百官奏請行聖尊后冊禮表

文武百官臣某等言伏奉制旨以聖尊后冊禮奉令
旨俟百日後上進者仰承嚴命固合遵行但以事有

未安理須陳奏中謝伏以歷代已來嗣極之主禮之
大者尊奉上宮儻或止儀未行庶事莫敢先舉所以
陛下裁膺冊禮即下制書長樂歸尊已先孝理百司
承式將撰吉辰及金輅言還六宮即叙惟憂典禮已
屬稽遲遽覩絲言備聽慈旨首在首麻之次誠極感傷
然凶吉之儀本無妨礙歷觀前載編考儒臣法度具
存事體至大况漁汗之澤普及諸侯簡冊之行便當
相次未修大禮交憚羣情伏乞陛下再稟嚴慈俯廻
聽允臣等幸塵有位庶免曠官冒瀆冕旒無任云云

賀德音表

文武百官某等言伏覩御札崇尚儉約克已庇民節
省服用去金玉之飾減放嬪御屏聲色之娛供進珍
羞製作竒巧中禁賜與內門資用並從損廢以緩征
徭宸翰章明德音流布凡百卿士至于兆人歡呼感
動倍百常品中賀臣聞文武之政方冊存焉知之非
艱行之不易故自三代已降繼體之君有師保之訓
以制其情有諫諍之臣以救其失及其行也猶未臻
焉豈有發自宸衷出於獨斷乾文昭煥至德宏新聳

動四方如此之盛者也伏惟陛下重熙撫運下武膺
期翼翼小心乾乾夕惕寅畏所感人神罔弗和仁明
所加細大罔弗理然猶勞謙訪道虛己求才日照天
臨山麓海納體唐堯之仁以親九族極虞舜之孝以
奉上宮率天下之尊以承顏問安舉四海之富以扇
枕調膳德既充矣化亦孚矣然後卹小民之艱食閔
羣吏之急徭息澤虞之征釋公田之禁崇足用之本
近取諸身致九年之儲無求於外斥靡曼之色咸遂
物情除玩珍之賜率由舊典去滛巧以急用罷私積

以歸公生人之耳目惟新風俗之澆淳立變先皇帝
貽翼子之訓垂聖人之資言有所未宣行有所未遠
陛下奉揚先志推而行之數年之間盛美斯備向若
非陛下之孝心廣達無以見先帝之聖作惟幾魏乎
煥乎不可得而名已昔者成湯因歲旱而罪已周成
動天威而責躬咸能即致時雍永錫繁祉豈若陛下
春秋方富中外方寧制於幾先行此難事宗社之降
靈可見邦家之流祚何窮率土之瀕孰不幸甚則臣
向所謂知之非難行之不易陛下既能行之矣臣又

聞行之甚易終之實艱願陛下慎而守之則登三邁
五夫何遠耶臣等幸塵班列無補盛明徒慙充位之
譏但賀蒼生之福措詞有盡順美難周臣等無任瞻
天仰德歡呼躍踊之極云云

謝詔撰 元宗實錄表

臣鉉伏奉詔諭以元宗皇帝實錄命臣修撰才微任
重恩厚責深拜捧絲綸若臨冰谷中謝臣聞握圖御
宇既憲章於在昔創法垂統亦啓佑於後昆然則至
德無名立功無迹惟日用而不竭豈淺局之能量是

以良史之才歷代為重以南董之直而無聞於成編
如遷固之能而不絕於浮議則知鋪陳王業昭灼皇
圖求之當仁豈易輕授伏惟元宗皇帝紹中興之統
承累洽之基大孝邁於有虞仁恕逾於漢祖愛人節
用得孝文之風重學崇儒有建元之烈東京則光武
章明以憂勤立政魏室則太祖陳王以文藻化人綜
是全功允昭聖德對越上帝敷佑下民二十年間慎
終如始陛下嗣膺寶歷欽若天明以累聖之資輔生
知之哲導揚休命啓煥貽謀故得畏軒后之神更延

三百配文王之祀永奉明堂必將著以丹青播於金
石斯為重任宜在鴻儒如臣者章句末流記問微學
遭逢之使塵玷司言豈意天鑒不遺宸慈過聽猥加
寵寄及此非才進退莫遑怔忡失次然臣祇事先帝
常忝近司沐玉澤以滋深欽皇風而永久報大君之
厚德誠有愚心則作者之清塵其如公議戴恩愈極
揣分彌驚未識津涯徒知慶躍云云

謝賜莊田表

右臣伏蒙宸慈念及闕乏特降宣旨為置莊田仍且

於少府監賜熟米二百石者望外之恩莫知所自撫躬拜命終懼且驚伏以臣稟性頗愚觸塗踈拙幸緣際會早玷清華祿秩之資既為過量吉凶之備皆沐優恩空費稻梁寧禪海嶽但以家傳清白族有羈孤雖欲居常終慙逼下蓋亦闇於世務非敢竊効古人伏惟陛下明極燭幽仁深廣覆親加寵諭曲軫殊私昔者葛亮薄田不聞君賜孫弘脫粟尚獲時譏如臣非才何以致此辭謬則有辜閔惻祇受則更覺貪饕徒承推食之恩轉積素餐之懼乾坤之施無可上酬

螻螻之軀惟知畢命

為蕭給事與楚王書

世事推移長塗圯隔違離軒砌二十餘年追念生平有覲心目伏承大王英謀奮發妙略宏施長驅伐叛之師克正奪宗之罪奉大朝之正朔慰全楚之驅歌成功上簡於帝心惠澤遠敷於疲俗風猷所及慶快同深儼早被恩私今通信問欣躍之極倍萬常情

又代蕭給事與楚王書

儼聞君子退人忠臣去國舊君有反服之禮交絕無

惡聲之嫌以義始終古今一也某受性無術闇於事
機佩師訓以周旋忘時態之險易追惟疇昔受遇先
王國士之知何嘗暫忘某復曳裾侯館委質府庭松
楸所依兄弟少長大義若此乃心如何而世事推移
譏言交鑿忠信獲罪干戈日尋某雖不才非敢愛死
過君以求名則不忍苟生以失節則不能誠恐最爾
之身終為執事之累所以仰冒嚴禁逃還故鄉出魯
國以悲歌向西河而下泣子鮮去衛非欲立朝梁鴻
適吳本期自質先皇帝恩深善貸義極緜懷采鄉曲

之棄妻收荆岑之遺璞遂得服勤州縣歷職朝廷始
望初心豈將及此但封疆負隔玉帛不尋奕世君臣
一朝胡越愧三州之父子羨五部之弟兄外覲交朋
俯慙章綬每春秋代序霜露交零飛江南之羣鴛嘶
岱北之朔馬悲興觸緒淚落霑襟自分沒身長懷永
歎而天將厭亂人或與能大王以命世之資克清家
難聖上以至仁之舉大濟橫流車書既同冠蓋相望
方承大王念幼蘭之逐客哀叢棘之離人煦以恩光
感之意氣乘軒食肉有若平時始聽音塵猶疑夢寐

徐集卷之三
且悲且慰五情無主苟非大人之德不以細故介懷
則惠好所臻孰能若是某又聞善父母者必推錫類
之感善兄弟者必廣棠棣之風故能功冠生民道濟
天下大王英謀遠略弘量深仁上國仰其嘉猷全楚
被其渥澤如某昔年事分曾無薑介之嫌今日支離
合在昭蘇之數况東西一體道路無虞儻蒙閱以懸
旌全斯大造兄弟子姪並許還朝存者荷二天之恩
沒者釋九原之恨則生死肉骨未可比量溼膽隳肝
寧萬一某以學古為家業以感義為素懷空言虛詞

且非說容皇天后土賢鑒此心猶覲拭玉張旃或從
行人之末捧匏執贄重趨典容之傍丹懇獲申微願
斯畢雖復身填溝壑猶望魂魄知歸攬筆陳詞悲來
橫集

復方納書

鉉以疎拙之性頑滯之資則於人曹無足比數然以
荷先人之業猥踐清貫讀往聖之書頗識通方累朝
舊恩漸於肌骨至於行道濟物立身揚名報國士之
知成天下之務竊不自揆頗嘗有心故膺耳目之寄

當津要之路侃然受任不以為憂而才與心違命與運背言出而不能寤主身廢而無足救時三年之中百艱備歷干戈擾於內地烽火照於闕庭奔走道路容身靡所當此時也苟得耕於南畝齊於一民以始終焉尚為幸也而副君將聖王道漸亨博采遺賢以濟多難贊諭之任首及非才拜命以來讒自憂媿何者儲后踐幼麓之重而處於承顏之地有從諫之善而立於無過之場徒欲持稊米以實太倉秉爝火以助羲御恐不足以副上德之舉塞故人之望也但當

正身潔已徇公滅私使內不媿於本心外不違於所學而已閣下德我太甚期我太深歷陽郡佐白君至京辱既手札慶譽優渥勗躬勤知己之情無以過此然此日副君之垂顧乃昔時閣下前席題品之所致也緘箴佩服何日忘之今兵難少寧蒸民未泰頂踵利物斯實其時閣下高卧已久羣望頗鬱宣室之召斯在不遠勉慎興居以副翹企悽悽之意遲用面論不宣某再拜

答林正字書

十二月日復書正字足下辱耽長牋詞高旨遠循環
捧讀欲罷不能見顧之深良足愧也吾子以老成之
智益救世之心一言悟主俯拾初筮雖位未充量然
升聞特達超然獨異亦古之所難也推是而往其道
可知鉉也不才猥廁先達雖復識不能見之於未兆
才不能濟之於已形然而振天下之公議舉天下之
公器推轂後進心無適莫庶幾不下於昔賢吾子異
日當知之不妄其古今之變安危之勢忽乎微哉未
可一二以言語盡也謹俟服日當接餘論聊奉還荅

伏惟鑒悉徐鉉白

荅左偃處士書

日月東海徐鉉荅拜稽首復書處士足下鉉讀聖人
之書探作者之意出處語默信非徒然故高卧堯舜
之代不為背時濡足楚漢之際不為趨利嗟夫天下
兵起百年于茲立功名取富貴者有之貞苦節安徒
步者何寂寞而無聞也愚常疑廉耻之風於是乎絕
而足下負磊落之氣畜清麗之才褐衣韋帶賦詩自
釋介然之操其殆庶乎悠悠之人尚未識其所謂惟

韓君叔言知之以鉉愛竒好古者也故屢稱足下之
行亟誦足下之詩相視欣然以為今猶古也然鉉才
名地望遠謝韓君故望廬息心不敢當隱君子之厚
顧足下德我太甚惠然而來咫尺之書則古人之道
在其中百篇之詩則作者之序冠其首先以溢美之
贈益以謙光之詞發緘欣翫不能自己又念昔之隱
者消聲物外絕迹時人今足下高蹈如彼自屈若此
得非以吾道久否思發憤而振起之爾鉉誠淺劣才
足以堪願契素交歲寒然後盛集續當歸納不宣鉉

再拜

故朝散大夫守禮部尚書柱國河內縣開
國男食邑三百戶賜紫金魚袋常公行狀
曾祖不仕祖泓邠州宣祿縣令考脩成
都府戶曹叅軍京兆府萬年縣洪固鄉曹
貴里常夢錫字孟圖年六十一狀

公字量恢弘識度宏曠質重有氣博學多聞初舉秀
才值世亂不克隨計西州羣后羔鴈交辟累為秦隴
諸郡判官岐王茂貞據有扶風傳國二世承制除公

寶雞縣令兼監察御史是時京洛屢變幕府驟更公
審擇木之所宜乃瞻焉而來止烈祖肇基王業物色
異人得公甚喜授大理司直今上初秉機務慎求賢
從公賢預焉允塞時望既授禪遷殿中侍御史改禮
部員外郎寓直中書預聞機密周慎詳敏冠于當時
烈祖深器之擢拜給事中封駁奏議無所顧憚由是
始為當塗者所疾今上嗣位恩禮甚優公以發號之
初四海瞻望機微所慎宜在斯時盡規極言如恐不
及於是大忤權貴貶佐池州明年徵為戶部郎中復

拜給事中仍充翰林學士知貢舉天子以典司詔命
最宜親密乃別置宣正院于內庭以先朝選授公為
稱職俾以內任專掌是司秋霜之操歲寒不易凡敢
言之士皆依賴焉甲辰歲諫臣皆貶公亦罷院事公
深惟君臣之義思全進退之禮稍儲伏臘將卜優游
又除吏部侍郎領御史臺事上復置文理院為司聰
之寄以公為文理院學士承旨公以椒蘭不雜絳灌
方隆從容中道守正而已明年以疾固辭乃遷戶部
尚書領商州刺史上以公問望夙重足以坐鎮雅俗

強起令知省事而病久不復公私廢失為宰相所劾
坐貶饒州上以羸瘵憂之詔留東都以便醫藥踰年
小愈徵為吏部侍郎翰林學士改禮部尚書戊午歲
冬十一月方與客談奄然而逝主上念藩邸之舊追
亮直之誠罷朝悲悼贈送優渥以嗣子方幼詔中使
監護其喪惟公誠純性剛文高學富詞賦典麗而執
筆甚稀名理精數而吐論甚簡多識故事洞明政體
自昇元中至保大之初便蕃密勿有犯無隱門絕私
謁出則說詞獨見先覺邈然靡及政先古義而時方

尚權論舉大體而人一掟給彼衆我克故不能克主
恩方重莫果歸由之心世路夷竟鬱濟時之用恥
為狷介之行以邀瞰察之名畜伎樂飲醇酒怡然自
得聊以卒歲啓手足之際無呻咄之聲古之達者正
當此耳丕以名法之學獲選丘門固非良史之才曷
紀賢人之德庶為實錄以俟易名謹狀

此文與門
生樹丕作

薦處士陳禹狀

右臣伏覩國家哀采羣才搜揚片善其有上書言事
者猶有可取必加甄錄廣納之意遐邇通知恩然臣竊

嘗觀之率皆淺近止於采取金寶檢權賦租製作舟
車斬伐材木巡察關禁收捕寇攘既利害相參亦虛
實畝半食祿者衆成務者稀若乃先王教化之源朝
廷刑政之本謂之迂濶音爾寂寥得人之盛未可致
也去夏有布衣陳禹詣獻納院上疏獨與衆異其言
曰五常之教不立度量之器不均又曰江鄉之民存
不事之以禮亡不祭之於室斯實有意於教化而不
汨於流俗者也臣於是訪其爲人則鄉曲無過延之
與語則靜默寡言僅使行顧其言才副其識則古之

循吏何以踰之願陛下以親民之職試其爲理考績
之際自有常科臣忝預銓司顧慙則哲謬妄論薦俯
伏兢惶謹奏

冊秀才文四首

自三五以還文質迭變百王之法六籍煥然及周室
既衰諸侯異政賢俊之士分軌並馳至如管仲霸齊
之功商鞅強秦之令申韓之名法孫吳之戰陣李悝
則務盡地力墨翟則崇尚節儉此其尤著者也蓋百
家之說雖其道不同奉而行之皆足以致理子大夫

服膺聖道必盡幽深試論其中孰得周孔之旨可為
當今之用者悉心極慮以著于篇

夫君者民之表也天下取則焉故慎威儀定其聲氣
時其憲令審其好惡以此示之未有不化者也然而
唐堯在上日用而不知聖祖立言親譽者其次夫如
是則寂然不動澹乎無為使蚩蚩之眊何所則象而
能革其浮偽驅之仁壽哉舉要立中必有其說

昔太公理齊因其俗故報政速而後世強伯禽為魯
易其俗故報政遲而後世弱然則商辛淫虐之風不
可不去也周家仁厚之化不可不被也修舊者未見
其遷善之塗革故者豈傷於惟新之義遲速之効強
弱之由願聞嘉言以釋斯惑

肉刑之法明王之制著於周禮垂憲無窮何故三苗
行之以為虐秦人奉之以為暴漢文除之以為仁乎
自魏晉以還議論間出理竟不決法竟不行豈時運
之變有殊將聖賢之才或異願聞歸趣以止古風

祭文獻太子文

粵惟上天降鑑我李文昭武穆神孫孝子赫矣謨訓

昭哉圖史以濟時屯以永千祀恭惟盛烈仰屬尊靈
惟精惟一克長克君有信厚之風以睦公族有孝勤
之德以奉天經避寵宗諱以止流俗主留分陝以樹
風聲惠下之政為民慈父平戎之績為國長城聳多
士之耳目煥萬古之丹青儲闈既止鴻猷允塞雖主
罷而納揆更承顏而養德四海無波百官成式光照
興運允答靈心宗祊之所託者重蒼生之所望者深
何國步之已泰忽神儀之永沈陽光為之而晝晦萬
籟為之而哀吟惟恩信之所洽孰憂傷之可任某等

迹備三千義深凡百或選自朝廷或仰由推擇或方
列於宮府或嘗陪於賓席分曹著位有先後之差辱
顧推誠無高卑之隔徒歲月以滋深愧涓塵之靡益
今也徒御分散軒墀闐寂摧傷於望蕘之前慟絕於
華池之側實邦家之不幸豈臣吏之空惜嗚呼哀哉
寢園斯啓遠日將從儼象輅以惟白建鸞旗而旒紅
聽寂歷以無覩視杳冥而遂空撫躬弔影涕雨號風
敢寓誠於籩豆庶寫恨於心胷願賓天之下降鑑永
慕之無窮嗚呼哀哉尚饗

與中書官負祭江學士文

維年月日廣平游簡言隴西李貽業清河張緯東海
徐鉉謹以清酌庶羞之奠敬祭于故翰林學士江公
君章之靈眇眇玄造茫茫萬有若明若晦為夭為壽
顏子不幸仲宣無後豈同槩之能量賢令名之不朽
惟公之生俊德高名一日千里三頃五城乃邦之彥
乃時之英萬然臺閣存此風聲惟公之沒音容倏忽
二子繼天高堂結髮有女垂髻摧心裂骨門館秋風
階庭夜月哀從中來云誰能遏簡言固陋夙奉光塵

廟朝之舊豈無佗人西垣並入禁署相因二十年中
心同道親曾無間隙靡或溜磷貽業不才依仁仰德
晚獲同舍因成近戚形忘累遣情深分密枉酒痛飲
光陰一擲豈料歡遊遽分今昔緯在三川論交早年
才力工拙詞場後先與之聲價借以騰鶩徒欣踐迹
敢曰差肩佗鄉會舊分依然倍成感歎轉奉周旋
鉉實後生幸為同族聯事之好友于之睦以道相許
以義相勗官路迤邐天涯謹逐千里關山定鄉心曲
自帝里連歸周行並復稅駕未安捨我何速嗚呼君

韋魂遊何方非巫陽之可招非祖洲之可望平時笑
語舊日顛狂何夢覺之不識何悲歡之不常惟四友
之分義成終天之感傷雖山公之無託豈延陵之可
忘有者在御有酒盈觴死生之會終于此堂願公如
在來為我嘗長號有慟迸淚無行薄奠云畢哀情未
央嗚呼哀哉尚饗

祭韓侍郎文

維開寶三年太歲庚午九月己亥朔七日乙巳東海
徐鉉謹以清酌庶羞之奠昭祭于故中書侍郎贈相

國昌黎公之靈天祐下民必生賢人數有治亂道或
亨屯君子處之全名保真窮不易節達不私身嗚呼
明公與道為鄰其本也忠其動也仁折而不撓屈則
能伸懋此成績揚于王庭名聞天下道合明君宜若
張公上應台星宜如衛武享茲百齡如何不淑與世
同塵城郭遺忠感深紫宸默婁之衾賜從御府季子
之印佩入泉扃知與不知孰無悲辛嗚呼哀哉某惟
不佞早奉光容傾蓋之交續綏相從公之知我如我
知公何義不協何言不同寧懼觸鱗之忤豈防羸角

之凶先號後笑無初有終霰雪既消陽光乃融海郡
山城幾於煦沫南宮西掖近見搏風宣主恩之可報
幸吾道之非窮今也歲月邁邁悲歡一空平生氣宇
夙昔心胃極視聽而無所與造化而冥蒙露泣門柳
霜凋井桐物感於外悲來自中生芻表德祭酒申恭
願貞魂之降鑒庶丹懇以斯通

祭王郎中文

維年月日朝議即行秘書省秘書郎直門下徐鉉謹
以庶羞之奠昭告于故郎中丈人之靈惟靈立身行

已之規理職奉公之節聞於士友著在官司今以銜
悲豈容繁述伏思頃歲獨奉深知獲承子妻之恩追
序通家之舊邕和二族出入十年情不間於初終義
實敦於骨肉去歲天恩舉善右掖登賢幸以王事僅
同省垣不隔陪侍靡違於旦夕興居常在於見聞雖
無光益之期且慰因依之望豈謂悲歡迭代光景須
臾才周旬歲之間奄斲終天之痛追攀靡及哀慕何
窮嗚呼哀哉昨聞訃之初方當卧病不得親臨易箚
躬奉遺言徒奄淚於漳濱但痛心於夜壑嗚呼哀哉

家存餘慶念屬帝心有後之期自符公議不孤之任
豈在它人嗚呼哀哉故國方遙良時未卜王畿寓殯
遠日將臨霧昏而丹旒悠揚月落而總帷蕭索涼風
助慘行路司悲瞻望靈筵酸辛無地勸陳薄奠少道
深懷髣髴明靈一賜臨降尚饗

祭劉司空文

惟靈氣稟冲和志推廉潔白璧蘊孚尹之美朱絃含
清越之音操行純深性克全於天爵襟懷弘遠譽早
播於人龍頃自奮迹清朝策名近侍既保後凋之節

終諧貞退之心道因損而益光名以謙而更著優游
自得忠孝歸全求之古人我復何愧某等幸承事舊
况預姻連眷分過私襟期莫逆歷歲時而彌固經夷
險而不回揖淡水以無厭仰高山而何極今則佳城
將啓遠日有期光容有隔於重泉賤竿聊申於薄奠
仰惟貞魄俯鑒丹誠尚饗

徐公文集卷第二十

東海徐鉉

徐公文集卷第二十一

東海徐鉉

奉和御製雪

豐登盈尺瑞物象九門深壁照環丹砌梅花滿上林
茶香偏自得酒力詎難禁別有寒郊外銀河映玉岑

奉和御製打毬

上閑精習渥洼驄玉鏤花鞍錦覆駿金埒無塵初裏
露未旗向日自生風雷傳画鼓偏增氣星度飛毬欲
映空共道宸遊因習武凱歌猶似奏平戎



又五言

彩仗映花韉春庭散曙煙毬飛皆應手馬駿不須鞭
仙樂飄雲外祥風近日邊籌多不虛發制勝在機先

奉和 御製春雨

初初甘雨正當春草樹精神一倍新勻灑農郊偏長
麥緩飄花檻不驚人衣隨宮仗環青輅普逐一皇恩
下紫宸霽後樓臺更堪望滿園桃李間松筠

冬至日奉和 御製

吹律改知寬迎長物倍安初陽殊勝臘積雪更添寒

庭寶羅千品珍符薦百般羣臣同偶聖不歎夜漫漫

奉和 御製寒食十韻

朝陽散宿烟登望思悠然簷影晴偏暖雲容晚更鮮
共歡時景好不惜歲華遷旋試嬌驄步新調寶瑟絃
宮花紅照耀御水碧潺湲歌吹清連夜輜輶麗滿川
依林張幄幕夾道建鞦韆仙樂來天上祥光起日邊
遊絲輕冉冉芳草綠芊芊 聖製如春色周流遍八
埏

奉和 御製歲日二首

運曆三元正升平太古同五侯皆輯瑞四海盡占風
聖政乾行內羣生壽域中撞鐘元會罷晃朗日升東
正仗臨軒萬國來漢儀周禮盡堪吟光浮雲蓋青龍
轉香透椒花白獸開慶賜應時均億兆卜年從此教
京垓羣臣共感文明運况是天言誠懋哉

二七言

奉和 御製上元燈

幔亭高敞九門前銀箭遲遲夜漏遙明月靜添華燭
影和風時度御爐烟朱輪繡轂車聲接玉勒金羈馬

首駢一曲雲謠飛聖藻萬方歌詠仰堯天

奉和 御製烟

春晴纖靄映斜陽暮幕偏能覆水鄉濃似慶雲同馥
郁薄如輕素自飛揚堤橫新柳真成畫樓對遙山正
好望誰見朝元香案上龍旂交影共騰驤

奉和 御製暑中書懷

浴殿晨開氣象清虛亭金井輓轡鳴陰成楊柳千絲
密涼入襟懷一扇輕寒水乍沉朱李熟薰綃長有好
風生高樓更稱頻臨望臺笠行歌麥隴青

徐集卷十一
三
奉和 御製聞早蟬

綠樹陰陰愜豫遊
早蟬清韻遠還收
喚迴晝夢和宮漏
引起微涼助麥秋
禁柳煙中飛乍覺
御溝聲裏聽偏幽
羣生遂性宸章悅
從此人間不識愁

奉和 御製夏中垂釣作

物茂時平日正長
翠華停馭睠方塘
文竿乍拂圓荷動
潁尾時翻素荇香
睿賞只應從暇豫
聖恩寧肯問沉翔
吞舟自是貪芳餌
猶笑成湯一面張

奉和 御製殿前松兼以書事

長松偃幹列承明
虎眈龍盤氣貌靈
風度乍聞琴曲調
巢高初見鶴儀形
枝籠陛戟寒生檻
葉帶鑪煙翠滿庭
澗底山頭各生殖
託根爭似在青冥

奉和 御製扇

齊紈新裂月輪全
蟬雀分明彩翠鮮
救暍自符仁主意
揚風須假手中扇
暫遮樓日霞光透
半掩歌唇寶曆圓
一曲睿調精比興
好將金石奉雕鐫

奉和 御製棊二首

制法精微自帝堯
勢如天陣布週遭
沉思迫覺忘千

微集卷三十一
四
慮妙訣終須附六韜急劫未分香印匝一枰初滿月
華高御詞仍許羣臣和愁殺山中玉兔毫

二

常嫌羣藝用心麤不及棋枰出萬途妙似孫吳論上
策深如夔益贊訥靜陳玉楹連琴榻密映珠簾對
酒壺 聖智縱橫歸掌握一先終不費多圖

奉和 御製早春

羣生遂性得天真陽景無私發秀勻堯曆永從新律
正 皇恩散作萬方春華林日麗紅苞拆太液冰消

綠浪新天意分明啓昌運岱宗即看報羣神

應 制賞花 懷字

上林春暮紫英開組繡成帷蔭玉階艷逐晨光隨步
武香和輕吹透襟懷生成澤廣時芳茂魚水情通樂
韻諧禁籞年年陪 睿賞何時梁甫奉燔柴

和陳處士在雍丘見寄

哀薄喜多幸退公誰與閑高人乘興去相望兩程間
卷箔有微雪登樓無遠山清談勝題贈何日杖藜還
送湯舍人之陳州

從筆集卷一
尼父恓惶地離情向北偏家貧聊復爾道在肯徒然
詩景明松雪鄉山隔水煙三年須赴召莫戀先頭眠

送阮監丞赴餘杭

楊柳依依水岸斜
蠲舟東去思無涯
坐臨碁局延明月
行采詩題對落花
虛白亭中多宴賞
錢塘湖上剩煙霞
風光到處宜
揚酒況有餘杭阿姥家

送容州程負外端州吳負外

士生東道義公論
重才名美哉雙白壁
高價等連城昔在南國時
折桂嘗抗衡今為北朝客
通籍齊振纓

連鑣適炎徼並命典州兵
地遠乃寄重無為憚遐征
俗雜則才難當在通其情
投香與還珠前哲有遺聲
君看奏諫者接武趨承明
揆袂贈斯言斯言勿見輕
和穎川賈監軍

別離情緒兩難任
消遣唯應有醉吟
冉冉光陰玄鬢改
勤勤書札舊情深
涼宵夢寐清淮月
永日徘徊玉樹陰
野鶴乘軒無所用
角巾何日返中林

和清源太保閑居偶懷

朝退閑齋落葉天
道心真氣本仙源
簾前風月澄秋

景門外輪蹄任世喧
棊罷早寒生北戶
酒醒黃菊滿西園
時人自有思齊者
殘迹觀形不在言

又和寄光山徐員外

早年南國日追隨
冠劍晶英佩陸離
匪石心誠徒自許
浮雲蹤跡信難知
官閑從飲扶頭酒
地僻誰同敵手棊
門館舊恩今更重
高齊遙枉謝公詩

和徐秘書

年少支離奈命何
悲秋懷舊苦吟多
龍泉有氣終難掩
荆玉無瑕豈憚磨
會偶良工收杞梓
莫將閑夢挂

煙蘿他年得路搏風去
肯念今朝照沫磨

送汪處士還黔歛

孤雲野鶴任天真
乘興遊梁又適秦
興去却歸南國去
黃山何謝武陵春

和翰長聞西樞副翰鄰居

開筵別有鄰居興
卜夜應憐禁漏長
舊友不期爭命駕
新姬憑寵刺傳觴
香煙結霧籠金鴨
燭焰成花照杏梁
京邑衣冠多勝賞
鱸魚爭敢道思鄉

和清源太保寄湖州潘郎中

老大離羣一倍愁，
山風物且淹留。醞成春酒誰斟酌，
抄得新書自校讎。莫似牧之矜曠達，
須教子重讓風流。思門舊分知難忘，
題取新詩上郡樓。

送南華張主簿改承縣

適去莊生邑，還臨孔父鄉。仍聞舊隱處，近在武夷傍。
道氣年長度，儒風日以光。何時看解組，歸去事仙方。

和白州錢使君上元夜侍宴

御宴宵陳敞，百層君恩芳。景兩難勝風，傳天上九成。
樂月映樓前，萬樹燈醉捧。玉觴凝夢寐，靜臨丹檻似。

飛騰因觀謝守牕，中詠自愧瀛洲是濫登。

送蘇州梁補闕

軋軋朱輪道路長，虎丘山下剩春光。軍城舊是吳王國，
郡守曾為諫署郎。祖席詠歌金玉振，下車條教蕙蘭香。
青雲舊是高飛處，三載徘徊亦未妨。

和金州錢太保春雨

濛濛膏雨遠空迷，點滴圓紋水繞堤。柳帶喜如和醉舞，
花房愁似宿粧啼。煙籠麥隴連天濶，雲映魚舟掠岸低。
廉使解分天子念，一篇騷雅慰蒸黎。

送高秀才

龍門一上嫌輕進，闕塞西游自愛山。
猿嶺春歸林影密，津橋人靜水聲閑。
如今正得幽尋興，佗日青雲不易還。

送施州單員外

精金百鍊始知難，何似仙枝兩度攀。
名逐鳳書歸故里，身從鳥道入巴山。
詔宣遠俗皇恩厚，惠洽齊民利刃閑。
珍重加餐順風土，歸來高步又人班。

送宣州張員外

故國干戈後，憐君得意歸。
綺霞橫郡閣，犀燭照魚磯。
天迥青山遠，江平白鳥飛。
此行同衣錦，况是老萊衣。

和筠州談鍊師見寄

共歎崑岡火，誰知玉自分。
寂寥人境外，蕭索數峰雲。
真籙終年秘，空歌偶得聞。
應憐霸陵上，哀病故將軍。

送吳郎西使成州

所向皆為道，遐征豈足辭。
中華垂盡處，別路正秋時。
高閣蘭臺筆，閑吟板屋詩。
良工無棄物，珍重歲寒姿。

送下博陳員外

曠望叢臺路飄飄楚塞人琴堂無故舊何計免霜中
送淨道人

北阜與西山前期夢寐間羨師乘興去應擬此生閑
喬木人誰在鱸魚我未還歸心寄秋水東去日潺潺
鄴都行在和刁秘書見寄

征袍結束從宸遊邊上塵清見戍樓柏殿賦詩知是
幸茂陵多病自堪愁清漳幽咽長流恨銅雀荒涼幾
換秋深羨高眠全道氣姓名應已在丹丘

和旻道人見寄

戎服非吾事華纓寄此身謬為金馬客本是釣鄉人
引領梁園雪揚鞭輦路塵知師亦多病擁褐待陽春

和復州李太保訓筆

處處良工事筆鋒宣毫自昔最稱雄因思南國中箱
學願入蘭臺掌握中委質幸歸彫玉匣搢詞曾侍兔
園宮一篇麗藻直閑暇共仰才多道不窮

送蒯員外東遊舊治

百歲猶強健知君即地仙孤飛下華表太息問桑田
故吏今誰在高名昔共傳伊余亦遺老相送亦潸然

送王監丞之歷陽

歎息曾遊處江邊故郡城青襟空皓首往事似前生
綠綬君重綰華簪我尚榮年衰俱近道莫話別離情
送阮殿丞之靜海

聞子東征効遠官行行春色黯離魂中途輟棹尋吳
苑西向登樓望海門鵬舍曾嗟經歲謫靈光空念歸
然存陵遷谷變今如此為我停驂盡酒樽

送周員外之達

之子敷王澤迢迢蜀棧東頒條有餘刃對酒與誰同

身占賢良籍家傳道德風遠民思靜理即此是陰功
送長社胡明府

黃綬繫未穩桂枝香尚新琴堂寧久次諫署正求人
皎皎涼秋月飄飄清路塵元常有遺翰求作篋中珍
送表姪達師歸鄱陽

故鄉禾黍世親稀中表相尋只有師惆悵離懷向何
許鄱陽湖上葉飛

送祕閣朱員外知復州

景陵山水舊知名珍重詩人建隼行未免簿書勞利

元寒不能借韻官字
最藩字之祀

徐集卷十一
六
刃省貪煙月縱高情揚雄閣下諸生送陸羽門前百
吏迎 聖代羣賢皆得路三年傾首望鵬程

送淨道人東遊

身服竺乾教心為鄒魯儒觀風遊稷下訪古入中都
短景程途遠寒原店舍孤東州多俊造能賞碧雲無

送李道士南遊

雲水李道士曾為中貴人綺紉終不戀松鶴自相親
雲氣蒼梧晚芳華紫蓋春匏瓜老猶繫惆悵望行塵

送國子徐博士之澧州

多才適世用學者不遑處新詞八詠樓更汎汾陽浦
行當應列宿且復施甘雨高齋閑坐時清談孰為伍

送錢副使黎陽發運

一盃寒食酒珍重送君行花影黎陽渡春風浚水聲
汎舟無廢事騁驥有脩程應用方無暇何須愴別情

寄張階州

儀甫秉忠信神明自來舍絳灌雖不容蠻貊皆從化
榮名任紛糾道性常閑暇傳語當途人無為勞歎吒

送文懿大師淨公西游

乘興西遊誰與同一囊詩藁一枝筇屐棲廬岳蓮花
社却訪南山紫閣峯懷古有時應帳望尋幽何處不
從容闕中風物常牽夢老卧閑曹轉放慵

奉和武功學士舍人紀贈文懿大師淨公

舊國荒涼成黍稷故交危脆似琉璃高人獨喜湯師
在手把新文教道碑

滿卷文章為世重出塵心迹少人同騰騰自得脩真
理不管浮生覺夢中

文似春華鋪曉陌思如泉涌注長江詩情道性知無

夢頻見殘燈照曙牕

已潔心源起世表却緣詩句有時名初聞行業如耆
宿及見容顏是後生

只有閑情搜景物不將容鬢惜流光京華才子多文
會眾許清詞每擅場

惠遠禪師名素重維摩居士室皆空羣公竟有詩相
贈組繡珠璣滿袖中

南朝人物古猶今只恐前身是道林處處經行常自
適不妨譚笑不妨吟

往往冥搜宵不寐時時任性晝仍眠高情麗句誰偏
重聖代詞臣李謫仙

霜髯病叟掩閑扃禪客相尋有故情每憶江南初識
面至今猶得愛才名

詠史

京洛多權豪游服相追隨青牛中甸車白馬連環羈
珎珮競照耀紳組舊參差騶鳴行人駐倏若流風馳
名園不問主下輦輒成嬉秦官錫雕盤光祿假羽卮
侏儒善為優邯鄲有名姬坐客應餘論顧眄成恩私

鹵簿留國門誰何不敢譏歸來卧華堂瑣牕承文楮
武夫瑩庭階壁璫擯榮題列燭正晶熒噴香常逶迤
明朝入君門密侍白玉墀開言迎合旨羣公默無為
乍請考工地亦拜狀下兒吹噓枯稊生指顧千鈞移
回瞻狗名士掾介爾何施朱雲折檻去梅福棄官歸
寂寞楊子雲口吃不能辭著書述聖道徒許俗人嗤
漢室已久壞往事垂于茲眇然千載下慷慨有餘悲

